

**Sunday, April 26, 2026**

**Time - 2:30pm - 2:35pm**

**AKASHVANI AIZAWL  
REGIONAL NEWS UNIT**

**REGIONAL NEWS BULLETIN  
(MIDDAY)**



**ILP**

Environment, Forest & Climate Change (EF&CC)changtu Minister Pu Lalthansanga'n Inner Line Permit (ILP) kalpui zel dan turah ngaihtuahna thui tak sen a ngaih thu a sawi.

MZP leh Mizo Official Channel tangkawp buatsaih D3 Inter College Debate Competition a hmanpuinaah he thu hi a sawi a he debate thupui pahnih 'Mizo hnam himna atan ILP hi a tha tawk a ni' tih leh 'Mizorama zu zawrh a hun tawh a ni' tih chungchang sawiin Minister chuan Mizo te chu hnam tlemte an nih thu leh ILP chu hnam inhumhimna tura saphoin an duan sak a ni a ti a, a kalpui zel dan turah ngaihtuahna thui tak Mizoten an sen a ngai tih a sawi a. Zu zawrh chu khawtlang leh Kohhran nghawng a nih thu sawiin zirlaite chu an thiamna zau tak nen an inelna thupui chu ngaihtuah zui turin a fuih bawk a ni.

EF&CC Minister chuan Forest department in theihtawp chhuahin thing leh mau an humhalh tih sawiin thing leh mau te a chereu zawh vek chuan khawvel lum chho zel nen ram ei leh bar thlengin nghawng a nei dawnani ati a, Ramngaw te humhalha hman tangkai chhoh zel a ngai tawh tih a sawibawk.

Debate intihsiakah hian Govt. Hrangbana College chu pakhatna niin Pachhunga University College chu pahnihna an ni.



## **FMD**

Myanmar rama ran natna/pulhri a len avangin Lawngtlai district bawrsap chuan Myanmar atanga bawng leh lawi lakluh a khap.

Lawngtlai district bawrsap Pu Donny Lalruatsanga chuan Lawngtlai district thenawm ram Myanmar ah bawng/lawi pul hri a leng mek nia thu dawn a nih avangin Lawngtlai District chhunga ran vulhte a lo him zawk theih nan, ramdang atanga Bawng leh Lawi lakluh khap tula hriat a ni, a ti a. Hemi avang hian Myanmar atangin Lawngtlai District chhungah Bawng leh Lawi lakluh khapna thupek a chhuah a ni. Myanmar a bawng leh lawi pulhri leng hi Foot and Mouth Disease ni a hriat a ni.

Bawrsap thupek hian Lawngtlai District pum a huam ang a, thu leh awm hma chu tihchhuah a nih atanga thla hnih chhung a huam ang.

Lawi leh Bawng pulhri chungchangah hian Lawngtlai a kan Corr zawhna chhangin District Veterinary Officer Dr. Charlie C. Chawngthu chuan he ran natna hi China lam atanga rawnlut, Myanmar a darh ta ni a an hriatthu a sawi a. Bawng leh lawi te chu an ke leh an ka chhung a na a, Foot and Mouth Disease ti a hriat ani a, tuntuma he natna hri leng mek hi a hma lama hetiang natna hri leng nen inang viau mahse, a venna damdawi erawh a hran a ngai niin a DVO chuan sawi a, natna hi a darh loh na'n a bikin Ran hmanga sumdawngte District Magistrate thupek tha taka zawm turin a chah a ni.



## **PASTORAL CONF.**

Zirtawpni zan atanga tan, Presbyterian kohhran Mizoram Synod hnuai bial inkhawmpui hman mek chu zaninah a tiak ang.

Zirtawpni zan kha inkhawmpui palai lawmna leh Report Inkhawm atan hman a ni a. Nimin nileng khan rolrel a ni a, nizan khan Pathian Biak inkhawm atan hun hman a ni. Vawiin Pathianni Chawhma leh Chawhnu-ah vantlang Pathian biak inkhawm a awm a. Zanah pawh vantlang Pathian Biak inkhawm a awm ang. Chawhnu inkhawmah Lalpa Zanriah Sakramen theh a ni ang a, zan inkhawmah Bial Chairman kalchhuak turten Valedictory Sermon an sawi ang. Pathian Biak Inkhawm hun hrang hrangah thupui sawi tura ruatten thuchah an sawi bawk dawn a ni.

Inkhawmpui hman dan tur leh programme kimchang hi Bial Nomination Committee-in an ngaihtuah thin a. Bial Inkhawmpui hi April thla Pathianni vawi 4-naah hman thin a ni a, eng emaw rokhawlhna avanga hmang hma hret leh hmang tlai hret an awm bawk a ni.



## MALARIA

Mizoramah sikserh (malaria) natna a hluar a, India rama sikserh tamna ber state a ni mek.

Mizoramah Malaria natna a la hluar hle a, tun dinhmunah India ramah mi sang khat zel atanga malaria vei hmuhchhuah zat (Annual Parasite Incidence-API) atanga chhutin Malaria tamna ber state nihna a hauh mek zel niin National Vector Borne Disease Control Programme (NVBDCP) hotute sian an sawi a. Mizoramah kum 2024 khan Malaria vei mi 16,899 awmin, mi 7 in an thipui a. Kum 2025 ah Malaria natna vei mi 9,328 an awm a, thihpui mi 6 an awm bawk a ni. Kumin 2026 Jan-March thla chhungin Malaria vei hmuhchhuah 666 awm tawhin thi erawhan awm lo ani.

Nimin kha World Malaria Day a ni a. He ni denchhen hian Mizorama District zawng zawngah Malaria dona atana hmalakna hrang hrang kalpuin, khawtlang mipui leh Pawl hrang hrang te nen Malaria chungchang inzirtirna hun te buatsaig a nih bakah Source Reduction Drive (Thosi pian theihna tui tling tihbo hnatlang) te, Lo/Huan neitu te Malaria laka an lo him theih na'na hmalakna chi hrang hrangte bakah school zirlai te nen hun hmanho a ni bawk a,heng bakah hian Malaria tamna District a Maxi-Cab leh HMV ah te Malaria Poster tar a ni bawk.



## MANN KI BAAT

Prime Minister Narendra Modi-a'n ramchhunga nuclear scientist-ten Kalpakkam, Tamil Nadu-a Fast Breeder Reactor, Criticality dinhmuna an dintir chu India tan thil chhuanawm tak a nih thu sawiin nuclear tha chakna chhawr tura India hmalak meknaa mel lung pawimawh tak a ni, a ti.

Vawiin Akahsvani-a Mann Ki Baat hun a hmanna-ah he thu hi a sawi a, Pu Modi-a chuan Criticality stage chu reactor-in a vawi khat nana nuclear chain reaction a siam theih hi a ni tih sawiin reactor chu operational phase-ah a awm tawh tihna a ni, a ti.

